

PHILLIPS, THOMAS (1772 - 1842), gweinidog Annibynnol ac athro

Enw: Thomas Phillips
Dyddiad geni: 1772
Dyddiad marw: 1842
Priod: Mary Phillips (née Jones)
Rhyw: Gwryw
Galwedigaeth: gweinidog Annibynnol ac athro
Maes gweithgaredd: Crefydd; Addysg
Awdur: John Dyfnallt Owen

Ganwyd 29 Mawrth 1772 yn Scythlyn, Llanfihangel Ioreth, Sir Gaerfyrddin. Hanoedd o deulu amlwg am ei grefyddolder. Addysgwyd ef mewn gwahanol ysgolion, yn eu plith ysgol Castell Hywel dan [David Davis](#). Derbyniwyd ef yn aelod ym Mhencader pan oedd rhwng 14 a 15 oed. Dechreuodd bregethu ym Mhencader yn 1792 a'i wahodd ar brawf i Ebenezer, Pontypwl, lle y bu am chwe mis. Derbyniodd alwad o Neuadd-lwyd ac urddwyd ef yno ar 5 Ebrill 1796. Priododd ar 29 Mawrth 1798. Gwasnaethai'n gyson ym Mhencader, cychwynnodd achos yn Llanbadarn, a nodd i'r achos yn Nhalybont, Ceredigion, rhwng 1796 a 1810. Sefydlwyd ysgol Neuadd-lwyd yn 1810 a'i hagor ar 15 Hydref y flwyddyn honno. O 1810 hyd 1840 bu gofal eglwys Neuadd-lwyd a'r ysgol arno. Cododd Phillips ysgol Neuaddlwyd i enwogrwydd mawr yn y wlad a chyrchai meibion y proffwydi yno i gael eu hyfforddi. Cynorthwyd ef yn yr ysgol gan rai o'i ddisgyblion gorau. Paratoi pregethwyr oedd uchelgais y prifathro ac nid magu ysgolheigion. Trwythai ei ddisgyblion yn llwyr yng ngwybodaeth yr Ysgrhythur. Ymhlith ei ddisgyblion yr oedd John Rowlands, Cwmllynfell, [David Jones](#) a [Thomas Bevan](#), y ddau genhadwr cyntaf i Madagascar, a [J. R. Kilsby Jones](#). Cyhoeddwyd pregethau o'i eiddo yn 1803, 1808, 1811; *Catecism*, 1812; *Natur Cyfamod Eglwys*, 1815; *Sypiau Grawnwin - Holwyddoreg*, 1818; *Ychydig o Hymnau Efengylaidd*, 1821 (ail argr., 1842). Ei brif waith oedd *Esoniad Byr ar y Testament Newydd*, 1831. Bu farw 22 Rhagfyr 1842.

Awdur

Y Parchedig John Dyfnallt Owen, (1873 - 1956)

Ffynonellau

Cofiant y diweddar Barch. Thomas Phillips, D.D. o'r Neuaddlwyd, Swydd Aberteifi (Llanelli 1845)

Hanes Eglwysi Annibynnol Cymru, iv, 106-10

Y Cofiadur, rhif 18, 70-4

Archifau LIGC: [NLW MS 10329B: Carmarthen Presbyterian College](#)

Darllen Pellach

William Evans, *Anerchiadau a phregethau a draddodwyd Ebrill 6ed, 1896, yn nghyfarfodydd dathliad trydedd jiwibili cychwyniad yr achos, a chanmlwyddiant sefydliad y diweddar Ddr. Phillips fel gweinidog yn Neuaddlwyd* (Llandyssul 1896)

Dolenni Ychwanegol

VIAF: [4580580](#)

Wikidata: [Q20748882](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

